

UNIONE


DONNE

ITALIANE



Comitato
Provinciale
di TREVISO

U.
D.
I.



VENARE SANTO

7 APRIL 1944

VERSI DIALETTALI

DI

A. ALBANESE

A BENEFICIO DEI BAMBINI VITTIME DELLA GUERRA

VENARE SANTO

7 APRIL 1944

*La zente gera quasi tuta a tola
o gera drio 'ndarghe, chieta chieta
ormai abituada al tira e mola
de un alarme, un cessato, e la corseta
de quei più spaurosi, che a salvarse
i coreva in rifugio a ripararse.*

*Quel dì, sarà sta circa mezo bòto,
che la sirena scumissiava a urlar,
i soliti al rifugio xe 'ndai sóto,
tanti continuava 'l so disnar;
ma poco dopo, quasi de sorpresa,
ga scumissià col batar la difesa.*

*Alora, la gran parte de la zente
ga subito cerca qualche canton
da 'ndarse a riparar, el più darente,
el più sicuro, sóto 'l repeton
de canonae, de rombo de motori,
che meteva 'l finimondo in tuti i cuori.*

VENARE SANTO

*Po' ghe xe sta 'na pausa, un fià de chiete,
chiete che gera quasi 'na speranza,
che ancuò le formazion fusse direte
in altri loghi, forse a gran distanza;
invessa no! boati, s-cianti, fògo,
crolar de case, urli, lamenti, un rògo.*

*Pochi minuti, çirca diese apena,
diese minuti che pareva dies' ani,
in quei diese minuti, quanta pena!
in quel fiantin de tempo, quanti dani!
Diese minuti ga guastà 'l sorriso
che gera impronta vecia de Treviso.*

*Passà quel uragan su la çità
ghe xe sta un gran silenzio de teror
tanti se domandava: che t sia quà?
che i vegna ancora?... sento 'l so rumor:
invessa quel rumor gera 'l spavento,
l'incubo, la tortura del momento.*

*Però ga durà poco quel colasso,
perchè la zente gera sosegada,
da l'afa, da la sé, dal polvarasso,
e chi podega xe vegnudi in strada;
ma quanto oror ai oci che vedeva
tanta rovina! e pianzar li fasseva.*

*Case crolae de quà, de là lamenti
de quei ciapadi sóto i rovinassi,
zente che ciama nomi de parenti,
zente che scava sóto piere e sassi,
mame che ciama i fioi, i fioi le mame,
strade ingolfae de piere e de legname.*

*'Na mama la ga in braccio un piçinin,
basandolo, per nome la lo ciama;
ma ormai no bate più quel coresin,
ormai no' 'l pol mai più risponder mama,
e con quel corpesin inanimà
come 'na mata, la va in quà, in là.*

*E come questo, quanti e quanti fati
dolorosi, che te cavàva 'l cuor:
quanta zente, fiori de tosati
straziadi, a tochi, sóto 'sto furor;
ghe gera morti un poco dapartuto,
quante fameje xe restade in luto.*

*Quante fameje xe restà ciapae
sóto i rifugi o sóto le so case,
quante fameje xe restà spojae
de quel che le gaveva e de la pase.
E quanta zente, co' do' strasse in spala
xe 'ndae a rifugiarse in te 'na stala.*

VENARE SANTO

*Questo xe 'l fruto de quel vanitoso
che ga inscenà la guera co' gran boria
dandose l' aria del gran prodigioso
per essar prototipo ne la storia;
ma invesse (poro can!) el xe finìo
come 'l se meritava e maledìo*

*Maledìo da quei che per vint' ani
ga avudo privazion, fame, imposture,
maledìo da quei, che come cani,
stà copai opur ga vuo torture,
maledìo, in fin, da tanta zente
che 'l mal governo ga ridoto a gnente.*

*Adesso, che finida xe la guera
e xe finìo : rovine, stragi e luti,
fè che torna a fiorir, sora 'sta tera,
la pase e l'amicizia in cor de tuti,
e tornerà a spuntar, su ti o Treviso,
quel che t'avevi perso... 'l to sorriso.*



INDUSTRIE POLIGRAFICHE
LONGO & ZOPPELLI — TREVISO